

VENDIM
Nr.917, datë 17.11.2010

PËR RISHPËRNDARJE FONDESH NË BUXHETIN E VITIT 2010, MIRATUAR PËR
MINISTRINË E EKONOMISË, TREGTISË DHE ENERGJETIKËS

Në mbështetje të nenit 100 të Kushtetutës, të nenit 44 të ligjit nr.9936, datë 26.6.2008 “Për menaxhimin e sistemit buxhetor në Republikën e Shqipërisë” dhe të ligjit nr.10 190, datë 27.11.2009 “Për buxhetin e vitit 2010”, të ndryshuar, me propozimin e Ministrit të Ekonomisë, Tregtisë dhe Energjetikës, Këshilli i Ministrave

VENDOSI:

1. Rishpërndarjen e fondeve në buxhetin e miratuar për vitin 2010, për Ministrinë e Ekonomisë, Tregtisë dhe Energjetikës, ndërmjet programeve, si më poshtë vijon:

a) Në programin “Planifikim, menaxhim dhe administrim” të shtohet fondi prej 4 602 625 (katër milionë e gjashtëqind e dy mijë e gjashtëqind e njëzet e pesë) lekësh, përkatësisht, në zërin “Paga”, në shumën 2 402 625 (dy milionë e katërqind e dy mijë e gjashtëqind e njëzet e pesë) lekë, dhe në zërin “Investime kapitale të brendshme”, në shumën 2 200 000 (dy milionë e dyqind mijë) lekë.

b) Në programin “Mbështetje për mbikëqyrjen e tregut, infrastrukturën e cilësisë dhe pronësinë industriale”, për Drejtorinë e Përgjithshme të Metrologjisë, të shtohet fondi 1 147 515 (një milion e njëqind e dyzet e shtatë mijë e pesëqind e pesëmbëdhjetë) lekë, i ndarë, përkatësisht, 1 097 375 (një milion e nëntëdhjetë e shtatë mijë e treqind e shtatëdhjetë e pesë) lekë, në zërin “Paga”, dhe 50 140 (pesëdhjetë mijë e njëqind e dyzet) lekë, në zërin “Sigurime shoqërore”.

c) Këto shtesa të përballohen nga pakësimet e fondeve në programin “Mbështetje për zhvillim ekonomik”, në vlerën 4 750 140 (katër milionë e shtatëqind e pesëdhjetë mijë e njëqind e dyzet) lekë, përkatësisht, për Qendrën Kombëtare të Licencimit, në vlerën 3 550 140 (tre milionë e pesëqind e pesëdhjetë mijë e njëqind e dyzet) lekë, nga të cilat, në zërin “Paga”, për 3 500 000 (tre milionë e pesëqind mijë) lekë, dhe në zërin “Sigurime shoqërore”, për 50 140 (pesëdhjetë mijë e njëqind e dyzet) lekë, si dhe për Albinvest, në zërin “Investime kapitale të brendshme”, në masën 1 200 000 (një milion e dyqind mijë) lekë, gjithashtu, nga pakësimi në programin “Mbështetje për burimet natyrore”, për RISHM-në, në vlerën 1 000 000 (një milion) lekë.

2. Ngarkohen Ministria e Ekonomisë, Tregtisë dhe Energjetikës dhe Ministria e Financave për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Sali Berisha